

VENDIM
Nr. 561, datë 8.10.2025

**PËR MIRATIMIN E RREGULLAVE TË HOLLËSISHME PËR VEPRIMTARINË,
EMËRIMIN, SHKARKIMIN DHE SHPËRBLIMIN E ANËTARËVE TË
KËSHILLIT MBIKËQYRËS TË AGJENCISË SË AUDITIMIT TË PROGRAMEVE
TË ASISTENCËS, AKREDITUAR NGA BASHKIMI EVROPIAN**

Në mbështetje të nenit 100 të Kushtetutës dhe të pikës 6, të nenit 10, të ligjit nr. 90/2016, “Për organizimin dhe funksionimin e Agjencisë së Auditimit të Programeve të Asistencës, Akredituar nga Bashkimi Evropian, në Republikën e Shqipërisë”, të ndryshuar, me propozimin e Kryeministrit, Këshilli i Ministrave

VENDOSI:

I. DISPOZITA TË PËRGJITHSHME

1. Objekti i këtij vendimi është përcaktimi i rregullave të hollësishme për veprimtarinë e Këshillit Mbikëqyrës të Agjencisë së Auditimit të Programeve të Asistencës, Akredituar nga Bashkimi Evropian në Republikën e Shqipërisë (në vijim “Këshilli Mbikëqyrës”), si dhe të procedurës për emërimin dhe shkarkimin e anëtarëve të tij.

2. Këshilli Mbikëqyrës e ushtron veprimtarinë në bazë të rregullave të përcaktuara në këtë vendim. Për çështje që nuk janë të rregulluara posaçërisht në këtë vendim, lidhur me funksionimin dhe veprimtarinë e Këshillit Mbikëqyrës, gjejnë zbatim parashikimet e legjislacionit për funksionimin e organeve kolegjiale të administratës shtetërore.

3. Në këtë vendim, termi dhe akronimi i mëposhtëm kanë këto kuptime:

a) “Ligj”, ligji nr. 90/2016, “Për organizimin dhe funksionimin e Agjencisë së Auditimit të Programeve të Asistencës, Akredituar nga Bashkimi Evropian, në Republikën e Shqipërisë”, të ndryshuar;

b) “AAPAA”, Agjencia e Auditimit të Programeve të Asistencës, Akredituar nga Bashkimi Evropian.

II. EMËRIMI DHE SHKARKIMI I ANËTARËVE TË KËSHILLIT MBIKËQYRËS

1. Këshilli Mbikëqyrës përbëhet nga 3 (tre) anëtarë, një nga të cilët është kryetar, dhe emërohen nga Kryeministri, sipas rregullave të përcaktuara në këtë vendim.

2. Emërimi i kryetarit dhe të anëtarit të Këshillit Mbikëqyrës bazohet në një procedurë të hapur e publike të konkurrimit të kryer nga Kryeministria, bazuar në kriteret e përcaktuara në nenin 12, të ligjit.

3. Shpallja e vendit të lirë për pozicionin e kryetarit apo të anëtarit të Këshillit Mbikëqyrës bëhet jo më vonë se 3 (tre) muaj nga data e përfundimit të mandatit, sipas përcaktimit të pikës 3, të nenit 10, të ligjit, dhe publikohet në Buletinin e Njoftimeve Publike, në faqen zyrtare elektronike të Kryeministrit dhe të AAPAA-së, për një periudhë 30-ditore.

4. Njoftimi për shpalljen e pozicionit të lirë përmban kriteret që duhet të plotësojë kandidati për kryetar apo anëtar i Këshillit Mbikëqyrës, dokumentacionin dhe afatin e dorëzimit të tij.

5. Në rastin e krijimit të vakancës së kryetarit ose anëtarit të Këshillit Mbikëqyrës të AAPAA-së, para përfundimit të mandatit, AAPAA-ja njofton menjëherë Kryeministrin për fillimin e procedurave për përzgjedhjen e kandidatëve për këto pozicione.

6. Për kryerjen e procedurave të përzgjedhjes për kryetar dhe anëtar të Këshillit Mbikëqyrës, Sekretari i Përgjithshëm në Kryeministri ngre një komision *ad-hoc* të përbërë nga 3 (tre) anëtarë të caktuar prej tij.

7. Vlerësimi i kandidatëve bazohet në jetëshkrimin (CV-në), që përfshin vlerësimin e arsimimit, kualifikime të larta profesionale, eksperiencën dhe trajnimet në profesion ose të lidhura me fushën, sipas kriterëve të përcaktuara në nenin 12, të ligjit.

8. Komisioni *ad-hoc* shqyrton dokumentacionin e paraqitur nga kandidatët dhe bën vlerësimin e kandidaturave të paraqitura brenda 30 (tridhjetë) ditëve nga data e përfundimit të afatit të dorëzimit të dokumentacionit, sipas pikës 3, të këtij kreu, harton listën e kandidatëve që plotësojnë kriteret ligjore e kualifikohen dhe ia paraqet atë Kryeministrit.

9. Në rastet kur pas përfundimit të procesit të vlerësimit rezulton se nuk ka kandidatë që plotësojnë kriteret ligjore të përcaktuara bëhet rishpallja e thirrjes për aplikime për pozicionin e kryetarit dhe anëtarëve të Këshillit Mbikëqyrës. Rishpallja e vendit të lirë për këto pozicione publikohet në të njëjtën mënyrë dhe për të njëjtën periudhë të përcaktuar në pikën 3, të këtij kreu. Për vlerësimin e kandidatëve zbatohen të njëjtat rregulla, sipas përcaktimeve në pikat 6-8, të këtij kreu.

10. Kryetari dhe anëtari i Këshillit Mbikëqyrës të AAPAA-së shkarkohet nga Kryeministri në këto raste:

- a) kur dënohet me vendim të formës së prerë për kryerjen e një vepre penale me dashje;
- b) kur mungon pa arsye në më shumë se tri mbledhje të njëpasnjëshme të Këshillit Mbikëqyrës;
- c) për shkak të paaftësisë profesionale;
- ç) kryen veprimtari që krijon konflikt interesi, në përputhje me legjislacionin e konfliktit të interesave;

- d) kur me veprimet e tij dëmton veprimtarinë e Këshillit Mbikëqyrës dhe imazhin e AAPAA-së.

11. Kryetari dhe anëtari i Këshillit Mbikëqyrës lirohet në këto raste:

- a) kur jep dorëheqjen;
- b) kur përfundon mandati 4-vjeçar i qëndrimit në detyrë;
- c) kur plotësohet mosha për pensionin e plotë të pleqërisë;
- ç) në rast vdekjeje të tij.

III. ZHVILLIMI I MBLEDHJEVE DHE VENDIMARRJA E KËSHILLIT MBIKËQYRËS

1. Këshilli Mbikëqyrës mbledhet jo më pak se një herë në 3 (tre) muaj.

2. Mbledhja e Këshillit Mbikëqyrës thirret me nismën e kryetarit dhe/ose me kërkesën e një anëtari, si dhe kur kërkohet nga drejtori i Përgjithshëm i AAPAA-së, sipas nevojave të institucionit. Në dy rastet e fundit, kërkesa i drejtohet kryetarit të Këshillit Mbikëqyrës.

3. Mbledhjet e Këshillit Mbikëqyrës janë të vlefshme nëse marrin pjesë jo më pak se 2 (dy) anëtarë. Në rastet kur nuk plotësohet ky numër, kryetari e shtyn mbledhjen për një kohë tjetër, duke njoftuar për këtë qëllim anëtarin/ët që nuk ishte/ishin i/të pranishëm.

4. Mbledhja drejtohet nga kryetari i Këshillit Mbikëqyrës dhe, në mungesë të tij, nga anëtari më i vjetër në moshë.

5. Vendimet merren me shumicë të thjeshtë të votave të anëtarëve të pranishëm. Në rastet kur nga votimi nuk arrihet shumica, vendimmarrja përcaktohet nga vota e kryetarit.

6. Kryetari dhe anëtarët e Këshillit Mbikëqyrës, gjatë ushtrimit të veprimtarisë së tyre, udhëhiqen nga parimet e përcaktuara në Kodin e Procedurave Administrative, si dhe në nenin 20, të ligjit.

7. Anëtarët e Këshillit Mbikëqyrës duhet të tërhiqen nga pjesëmarrja në mbledhjen e këshillit në rastet kur ekziston një nga pengesat ligjore të parashikuara në nenin 30, të Kodit të Procedurave Administrative. Në këtë rast, anëtari detyrohet të deklarojë me shkrim interesat e tij që në fillim të diskutimit për çështjen konkrete.

8. Këshilli Mbikëqyrës, gjatë ushtrimit të veprimtarisë së tij, asistohet nga sekretariati teknik, i përbërë nga punonjës të AAPAA-së, të caktuar nga drejtori i Përgjithshëm.

9. Zbardhja e vendimeve të Këshillit Mbikëqyrës bëhet nga sekretariati teknik, brenda 5 (pesë) ditëve punë, pas ditës së përfundimit të mbledhjes.

10. Vendimet e Këshillit Mbikëqyrës publikohen në faqen zyrtare të AAPAA-së.

11. Në çdo mbledhje të Këshillit Mbikëqyrës hartohet një procesverbal i detajuar, i cili mbahet nga sekretariati teknik dhe depozitohet në zyrën e arkiv-protokollit të AAPAA-së.

12. Procesverbali i paraqitet për miratim të gjithë anëtarëve në fund të mbledhjes ose në fillim të mbledhjes pasardhëse. Pas miratimit, procesverbali nënshkruhet së bashku nga kryetari dhe sekretari.

IV. SHPËRBLIMI I ANËTARËVE TË KËSHILLIT MBIKËQYRËS

Shpërblimi për pjesëmarrje në mbledhje për kryetarin dhe anëtarët e Këshillit Mbikëqyrës bëhet sipas përcaktimeve të vendimit nr. 656, datë 31.10.2018, Këshillit të Ministrave, “Për përcaktimin e masës së shpërblimit të anëtarëve të këshillave, bordeve ose komisioneve të njëjësive të qeverisjes qendrore”, të ndryshuar.

V. DISPOZITË E FUNDIT

Ngarkohen Kryeministria dhe Agjencia e Auditimit të Programeve të Asistencës, Akredituar nga Bashkimi Evropian për zbatimin e këtij vendimi.

Ky vendim hyn në fuqi pas botimit në Fletoren Zyrtare.

KRYEMINISTËR
Edi Rama